

**Saammaasseqatigiinnissamut Isumalioqatigiissitat innersuussutaat arfineq marluk naammassiniarlugit suliniummik aallartitsinissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, iliuusissatullu pilersaarut UPA2023-imi Naalakkersuisunit Inatsisartunut saqqummiunneqartussa**  
(Inatsisartunut ilaasortaq Doris Jakobsen Jensen, Siumut)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerneqarnera**

Naalakkersuisut sinnerlugit Inatsisartuni ilaasortap Doris Jakobsen Jensenip Siumumeersup, Inatsisartut aalajangiiffigisassaattut siunnersuummik saqqummiussaqaqarneranut qutsavigaara.

Saammaasseqatigiinnissamut isumalioqatigiissitap innersuussutaanik aallartitsinissamut suliniuteqarusunnermut aammalu tamanna pillugu iliuusissatut pilersaarummik suliaqartoqarnissaanut Naalakkersuisut paasinnilluarput.

Ilisimatitsissutigineqassaaq innersuussutit ulluinnarni sulinermi ilaatinneqalereermata. Tamanna ima pisinnaavoq, innersuussutinik toqqaannartumik suliaqarnermi imaluunniit innersuussutigineqarsimasunut sammitinneqartunut tunngatillugu inassuteqartoqartillugu.

Suliassaqarfiit siunnersuutitut ataasiakkaanut attuumassuteqartut atugassaritinneqartut tunngavigalugit siunnersuutit immikkoortortaqaqarfimminnut attuumassuteqartut tamakkiisumik ilaannakortumilluunniit pingaarnersiorsinnaavaat.

Ilisimatitsissutitut oqaatigineqarsinnaavoq siunnersuutini arfineq-marluusuni tallimat Naalakkersuisunit imaluunniit suliniuteqartunit allanit aallartinneqarsimammata.

Innersuussutitut sinneruttunut suli aallartinneqarsimangitsunut tunngatillugu, siunissami nalilersorneqartassapput qanoq aallartinneqarsinnaanerannut suliniuteqartoqarsinnaanersoq.

Tamatumalu kingunerisaanik Naalakkersuisut imaattunik allannguutissatut siunnersuuteqarput:

***Naalakkersuisut UPA2023-mi ataatsimiinnermi saammaasseqatigiinnissaq pillugu isumalioqatigiissitat innersuussutaannut suliaqarnerup killiffianik kiisalu siunnersuutitik suliaqarnerup ingerlaqqinnissaanut iliuusissatut pilersaarummik Inatsisartunut saqqummiusseqqullugit peqquneqarnissaannik siunnersuut.***

Allannguutissatut siunnersuutip aningaasatigut imaluunniit allaffissornermi kinguneqassanngitsoq ilanngullugu Naalakkersuisunit nalilerneqarpoq.